

কাব্যমঞ্জরী ।

ভূমিকা ।

তাপময় এই ধরা, সুধু বিষ-ফল-ভরা ;
আস্বাদে মুমূষু জনগণ ;
সে বাতনা জুড়াইতে, লোকে দিব্য ফল দিতে,
কাব্য কল্পিতকর সৃজন ।
এক ক্ষুদ্র শাখা তার, অতি যত্ন সহকার,
হৃদে আমি করিয়া রোপণ,
আশা করি সুধা-ফল, নিয়ত শীলন-জ্বল,
করিলাম তাহাতে সিঞ্চন ।
পেয়ে ক্ষেত্র অনুকূল, হলো চারা বর্দ্ধ-মূল,
কালেতে ধরিল এ মঞ্জরী ;
কাব্যামোদি-বন্ধু যাঁরা, অতিশয় প্রীত তাঁরা,
এ সকল দরশন করি ।
তাঁহাদের মতগামী হইয়া, এসব আমি
অন্ত করিতেছি প্রকটন ;
পণ্ডিত-মধুপগণ, যেন অনুরক্ত হন,
এই মাত্র মম আকিঞ্চন ॥

কাব্যসঞ্জয়ী ।

কবিতার জন্ম ।



এক নিশি শশি-করে, গ্রীষ্ম-দন্ধ-কলেবরে,
একা আমি ত্যজিয়া ভবন,
ভ্রমিতে ভ্রমিতে ধীরে, গেলাম জাহ্নবী-তীরে,
সেবিতে শীতল সমীরণ ।
হয়ে তথা উপনীত, সুস্থির করিয়া চিৎ,
মুখে গঙ্গাজল প্রক্ষালনে,—
বালুকা-পুলিনে বসি, দেখিতে ছিলাম শশী
বিস্তিত সে সলিল দর্পণে ।
হেনকালে কর্ণে মম, ভ্রমর-গুঞ্জর সম,
প্রবেশিল রোদনের ধ্বনি ;
ইতস্ততঃ নেত্রপাত করি, দেখি অকস্মাৎ,
দক্ষিণে কাঁদিছে এক ধনী ।
পদ্মগন্ধা সেই নারী, পদ্ম জিনি সুকুমারী,
পদ্মা সমা বসি পদ্মাসনে ;
মনোহরা বর-তনু, যথা পুরন্দর-ধনু,
বরষায় সুদৃশ্য গগণে ।
নেত্র হতে অনিবার, বহিতেছে অশ্রুধার ;
নির্ঝর হইতে যথা জল ।

* হৃত কবিবর ঈশ্বরচন্দ্র গুপ্তের সত্য্যর কিঞ্চিৎ পরেই এই
প্রবন্ধ লেখা হইয়াছিল :

শরীর কোমল হেন, অনুমান হয় যেন
নিখাসে বিদরে উরঃস্থল ।
এলায়ে পড়েছে কেশ, ছিন্ন ভিন্ন ভূষা, বেশ,
বাম-করে লগ্ন বাম গাল ;
দেখি মনে ভ্রম হয়, হিম-পূর্ণ কুশেশয়
বিরাজিত সহিত মৃগাল ।
তার শোক দরশনে, দুঃখ-পরি-পূর্ণ-মনে,
সুধালাম বিনয় বচনে,
“ কে তুমি ? কাহার নারী ? বিধু-মুখ করি ভারি,
একেলা কাঁদিছ কি কারণে ?
আপনার পরিচয়, দেহ, ধনি, সমুদয়,
কোন ভয় না মানিও মনে,
যদি কিছু উপকার, সাধ্য থাকে করিবার,
অবশ্য করিব প্রাণপণে । ”
আমার কথায় ধনী, চমকি উঠি অমনি,
কষ্টেতে রোদন সম্বরিল ;
স্বর-বন্ধ নেত্র-নীরে, মৃদু ভাষে ধীরে, ধীরে,
এই মত কহিতে লাগিল ।
“ পৃথিবীর বাল্যকালে, যখন তিমির জ্বলে
ব্যাপ্ত ছিল মানবের মন,
মিথ্যানাগ্নী দিতি-সুতা, কাম-রূপা, মায়া-যুতা,
ভূ-মণ্ডল করিল শাসন ।
মন্ত্ৰের মোহন-ফাঁদে, ভূতলে আনিয়া চাঁদে,
সে দানবী পতিত্বে বরিল ;

তাহাতে জন্মিল কন্যা, রূপেতে ধরনী ধন্যা,
 নাম তার কম্পনা রাখিল ।
 শুরু-পক্ষ-চন্দ্রোপমা, সে কুমারী মনোরমা,
 বাড়িয়া উঠিল দিন দিন ;
 কৈশোরে রূপের তার, উপমা ছিলনা আর,
 শশি-দেবী নলিন মলিন ।
 বালা যত লীলা খেলা করিত অনুঢ়া-বেলা,
 এক মুখে না হয় বর্ণন,
 আরোহি আকাশ-যানে, ভ্রমিত সে নানা স্থানে,
 গিরি, দরী, নগর, কানন ;
 কভু মেঘ-লোকে রঞ্জে, নাচিত চপলা সঞ্জে,
 জলদের দুন্দুভির তালে ;
 কিম্বা, ধরি ইন্দ্রধনু, জলে নেহারিত তনু,
 বিভূষিতা বলাকার মালে ।
 এমন অপূর্ব মেয়ে, শুভাদৃষ্ট ফলে পেয়ে,
 মিথ্যার বাড়িল অহঙ্কার ;
 নাশিতে তাহার মান, দর্প-হারি-ভগবান্,
 করিলেন উপায় তাহার ।
 সূর্য্য-লোক পরিহরি, অবনীতে অবতরি,
 সত্যদেব হইলা প্রকাশ ;
 মধ্যাহ্ন সহস্র-কর, জিনিয়া প্রাণর-তর,
 মুখে যার আশ্চর্য্য বিভাস ।
 গৌর কাস্তি, শুরু বেশ, কলঙ্কের নাহি লেশ,
 অতিশয় উন্নত আকার,

অংশুমান জটাজাল, বাহুদ্বয় সুবিশাল,
বক্ষঃস্থল বিপুল-বিস্তার ।
বিচার নামেতে তাঁর, করে ধর তরবার,
অগ্নি-শিখা সম সমুজ্জ্বল ;
তাহার ভীষণাকার দেখি, মানি চমৎকার,
কাঁপিল মিথ্যার দল বল ।
সত্য-দেব পদার্পণে, সসৈন্য, সশঙ্ক-মনে,
পলায় অজ্ঞান-সেনাপতি ;
যুগেন্দ্রে দেখিলে পরে, যেমন ত্রাসিতাস্তুরে,
যুগেরা পলায় দ্রুতগতি ।
তথাপি যে সব স্থান, সত্য-দেব ত্যজি যান,
পুনঃ তথা আসিয়া অজ্ঞান,
বলিয়া মিথ্যার জয়, অধিকার করে লয় ;
তিনি এলে আবার প্রশ্ৰয় ।
কিছু কাল এইমত, বিগ্রহে হইল গত ;
মিথ্যা ত হারিয়া নাহি হারে ;
কিন্তু ক্রমে ছারখার, দেখি নিজ অধিকার,
ব্যগ্র হলো সন্ধি করিবারে ।
এ দিকেতে মহামতি, সত্য-দেব ত্যক্ত অতি,
স্বীয় ধামে যেতে আকিঞ্চন ;
হেন কালে দৈবান্বিত, পৃথি-মধ্যে এক দিন,
কম্পনার সহ সংঘটন ।
যেন দীপ্ত-সৌদামিনী, হেরি সেই সীমন্তিনী,
মুগ্ধ সত্যদেবের মানস ;

করস্থ বিচার-অসি, ভূতলে পড়িল খসি ;

হৃদয়ে জন্মিল নব রস ।

মিথ্যা-স্মৃতা কাছে গিয়া, সবিনয় সম্ভাষিয়া,

পানি-গ্রহণের অভিলাষ,

মধুর, মোহন স্বরে, সত্যদেব সকাভরে,

অতঃপর করিলা প্রকাশ ।

তার রূপ নিরীক্ষণে, মোহিনী মোহিত-মনে

সম্মতি জানাল মৌন ছলে ;

গল-মাল্য বদলিয়া, তখন গান্ধার্ব-বিয়া,

দুজনে করিলা সেই স্থলে ।

মাতা রাগ করে পাছে, এই ভয়ে তার কাছে,

একথা না কহিল ললনা ;

কিছু দিন পরে তারি, উদর হইল ভারী,

গর্ভিণী হইল চন্দ্রাননা ।

গর্ভ প্রকাশের ডরে, না থাকিতে পারি ঘরে,

বনে বালা করিল প্রস্থান ;

মিথ্যা মিথ্যা অনুমানে, চড়ি বুঝি ব্যোম-যানে,

নন্দিনী ভ্রমিছে নানা স্থান ।

দশমাস গর্ভ ধরি, আমারে প্রসব করি,

জন-শূন্য অরণ্য ভিতর,

কম্পনা নিষ্ঠুর মনে, বাল্মীকির তপোবনে,

ফেলি চলিলেন অতঃপর ।

দৈব-যোগে বাগীশ্বরী, ভ্রমণের ইচ্ছা করি,

হঠাৎ নামিয়া সেই স্থলে ;

কবিতার জন্ম ।

দেখিলেন সন্তোষাজাতা, কন্যা এক বিনা মাতা,
কাঁদিলে পড়িয়া বৃক্ষতলে ।
দৃষ্টি মাত্র সেই ক্ষণ, মম জন্ম-বিবরণ
জানি দেবী অস্তুর-যামিনী,
স্নেহার্দ্ৰ, দয়ার্দ্ৰ মনে, ভূমি হতে সযতনে,
কোলে লৈলা হয়ে উৎসুকিনী ।
তৎপরে আমারে লয়ে, বাল্মীকির পর্ণালয়ে,
বাণী মাতা করিলা গমন ;
মুনির নিকটে গিয়া, কোলে তাঁর সমর্পিয়া,
আজ্ঞা দিলা করিতে পালন ।
বাল্য-কালে পিতৃ-সম, পালি সে মুনিসন্তম,
কবিতা রাখিলা মম নাম,
আমারে হৃদয়ে করি, রামের চরিত স্মরি,
রচিলেন কাব্য অভিরাম ।
কৈশোর অতীত হলে, সরস্বতী কুতূহলে,
আমারে করিলা সহচরী ;
দিয়া নানা অলঙ্কার, সদা কাছে আপনার,
রাখিতেন অনুগ্রহ করি ।
এক দিন তাঁর সঙ্গে, বিমানে চড়িয়া রঙ্গে,
গেলাম পিতার নিকেতনে ।
পোয়ে মম পরিচয়, সত্যদেব সহৃদয়,
ভুসিলেন করুণ-বচনে ।
পরে আত্ম-বিবরণ, করিলেন বিজ্ঞাপন,—
মিথ্যার না যুচে অধিকার ।

উঁহার প্রচণ্ডালোকে, ভয় পেয়ে অজ্ঞ লোকে,
নিকটেতে নাহি আসে আর ।

অনেকেতে এ প্রকার, শরণ লয়ে ও তাঁর,
মিথ্যা প্রতি আসক্ত-হৃদয় ;—

আশ্চর্য চন্দ্র-করে, লোকে যথা বাঞ্ছা করে,
দেখিতে স্বভাব-শোভা-চয় ।

শুনিয়া পিতার বাণী, ভগবতী বীণাপাণি,
পরামর্শ দিলেন তাঁহারে ।

‘মিথ্যা-প্রিয় প্রজা দলে আনিবারে করতলে
দেহ ভার তোমার কন্যারে ।

‘কবিতার অধিষ্ঠান, হয় দেখ যে যে স্থান,
ত্রিদিব তথায় আবির্ভাব ;

‘পদ-ন্যাসে সুকোমল, ফুটে শত শতদল,
শোভা ধরে সমস্ত স্বভাব ।

‘নিন্দিয়া তরুণ-রবি, তব নন্দিনীর ছবি,
পিকবর জিনিয়া সুস্বর ;

‘রূপে আর সুধা-ভাষে, ভুলে লোকে অনায়াসে,
হইবে উহার অনুচর ।

‘রূপক-পুষ্পক-রথে, যে সময় মনোরথে,
তব সুতা করিবে ভ্রমণ,

‘মিথ্যাধীন প্রজাগণে, কাম্পনা ভাবিয়া মনে,
লবে আসি উহার শরণ ।

‘করিতে মানস-বশ, শিখায়েছি নবরস ;
প্রত্যেকে হইবে সহকারী ;

‘বাহার বেমন মন, তারি মত রসায়ন,
করিবেন তোমার কুমারী ।’

তাতে এই সুমন্ত্রণা, দিয়া খেত-পদ্মাসনা,
অমনি হইলা অসুজ্ঞান ।

সে অবধি এই মর্ত্যে, লোকের হিতের অর্থে,
আমি করিলাম অবস্থান ।

কলিতে সাহিত্য-রবি, কালিদাস মহাকবি,—
বর-পুত্র ছিল সে আমার ।

কণ্ঠে তার করি বাস, শকুন্তলা-ইতিহাস
করিলাম নাট্যেতে প্রচার ।

আর আর চমৎকার, কাব্য যত আছে তার,
মম বরে সকলি রচিত ;

অত্ৰাপি তাদের রস, পান করি গায় যশ,
যত সব রসিক পণ্ডিত ।

কিন্তু হায়! বাহুবলে যখন যবন দলে
ভারত করিল অধিকার,

স্বাধীনতা-দেবী সঙ্কে, ভঙ্গ-মনে মান-ভঙ্গে,
করিলাম দেশ পরিহার ।

শতাব্দ হলো লঙ্ঘন, রুঞ্চচন্দ্র ভূভূষণ,
বঙ্গ-রাজ্যে আনিল আমায় ;

আমা হৈতে সদাশয় লভিলেন কবিদ্বয়—
প্রসাদ, ভারতচন্দ্র রায় ।

মম পূর্বদুঃখ যত, প্রায় হয়ে ছিল গত,
উভয়ের সুখ্যাতি শ্রবণে ;

তাদিগে হারায়, হায় ! শোকাগুন পুনরায়,
দ্বিগুণ উঠিল জ্বলি মনে ।

তারি কিছু কাল পর, মদন ও কবীন্দ্র,
নির্বাণ করিল সে অনল ;

কাল কিন্তু বাদ করি, আবার তাদিগে হরি,
করিয়াছে অস্তুর বিকল ।

সেই শোকে অনিবার চক্ষে বহে অশ্রুধার ;
পুত্র আর পাব কি তেমন !

দুঃখে বুক ফেটে যায় ; এ কথা কহিব কায়,
করি তাই নির্জনে রোদন ।”

‘কবিতা’ দেবীর কথা শুনে, মনে হল ব্যথা,
নয়ন ভাসিল অশ্রুণীরে ;

সাস্তুনা করিতে যাই, কিন্তু দেখি তিনি নাই ;
একা আমি বসি গঙ্গা-তীরে ।
